

## Rau To Petrus Imbooda Muun 1 Pita—1 Peter

<sup>1</sup> You Petrus, mbanjoonja to Yesu Krisi. Nambood rau tonene ilat to yam tamtoghon to Maaron to aneep arau ndug ndug izi taan suruvu to Pontus, Galesia, Kapadosia, Asia, ve Bitinia. Onoon nepoon tiam to taan, yam aneep anim loomba moghon. Eemoghon ndug tiam kat, nene sambam.

*Pil 3:20; Hib*

*11:13+*

<sup>2</sup> Muun kat, Tamaan Maaron isia gham anim le itaghon tau ngar toni. Ve ila uraat to Avuvu Patabuan, ye igham gham anim tamtoghon toni patabuanja. Tauto aazne, ataghon ngar to Yesu Krisi, ve Yesu sinj toni izala poghomim le angalaan ila Maaron mata wa.

*Ro 8:29; 2Tes 2:13*

Poia tiina to Maaron iza tiam, ve igham gham aneep poia kat toman lolomim luuma. Onoon.

*Maaron igham ghiit tanim paghu wa. Tauto aazne tasaan nepoon poia to ndug sambam*

<sup>3-4</sup> Iit tapait Tiina toit Yesu Krisi Tama Maaron pa poia toni. Pasa, ye lolo isamin ghiit ve ate waaro iit kat. Aghita. Ye ipamundigin Yesu Krisi pa mateen, ve ila mundigiin to Krisi, iit tagham nepoon paghu wa. Tauto izaad pa nepoon to taneep mataad iyaryaar le alok, ve aazne taghurghur mataad pa nepoon tonowen.

*Yo 3:3; Ep 1:18+; Tit 3:5+*

Nepoon to isasaan ghiit izi ndug sambam, nene poia moghon. Ve irau isami, ma isob ne maau.

Inepneep tovene itaghoni taghoni gha ila. Pasa, Maaron tau ingini pait. *Kol 1:5; 2Tim 4:8*

<sup>5</sup> Yam to aghur ila to Kriisi, Maaron tau tapiri inim sigeu payam. Ve ye pale ingin gham tovene ila ila le sawa to Mbon Muri, ghoru ipatoon ulaan toni ivot ighazoon, ve igham mulin gham. Ulaan tonowen, ye igharaata pataghaan wa. *Yo 10:28+, 17:11+; Jud 1:1*

<sup>6</sup> Yam agham ngar pa mbeb naol to nasavia di ne, tauto igham gham lolomim poia le poia kat. Onoon, sawa tonene, yam avaat lolomim ipatanan. Pasa, tovaan naol naol tivotvot payam. Eemoghon tovaan tiam tonanan, eta ivot sorok maau. Tisob tivot titaghon Maaron ngar toni. Ve tineep mala maau. Pale tisob. *Mt 5:12; 2Kor 4:17; 1Pe 5:10*

<sup>7</sup> Sawa to tigharaat gol, tighuri ila yab, leso yab ighan muuna ighau pani le ingalaan kat. Onoon, tamtoghon tighita gol tighaze nene mbaliin tau. Eemoghon gol irau ineep le alok maau. Muri pale ilale. Ve ghurla tiam, nene mbeb tiina kat ilib pa gol. Tauto Maaron ipul tovaan pida tivotvot payam, leso itoov ghurla tiam, ve ighami ingalaan kat inimale gol to tighuri ila yab. Ighaze yam ayoon ariana pa badoon patanani, nene ipatoon gham ighaze ghurla tiam, nene mbeb tau. Tovenen sawa to Yesu Kriisi ipatoon tau ivot ighazoon, nene pale Maaron ipait gham ve izamim inim tiina. *Mbo 66:10+; Yems 1:3*

<sup>8</sup> Onoon, yam aghita Kriisi pa matamim pa eta sone. Eemoghon aghur ila toni, ve lolomim pani kat. Tauto igham gham lolomim poia le poia kat. Ighaze atoova pa asavia lolomim, pale asavia iza

to sa? Mbeb eta iraua maau. *Yo 20:29; 2Kor 5:7*  
 9 Pasa, yam aghur ila to Krisi aghaze ye pale igham  
 mulin gham ve aneep pooi. Ve aazne, aghitghita  
 ghurla tiam anona pida tivotvot. *Ro 6:22*

*Muun, yes propeta tisavia uraat to Krisi*

10-11 Uraat to Krisi ighami pa igham mulin gham,  
 toman poia to Maaron to aazne izaza tiam, yes  
 propeta to tivotia Maaron aliņa tisavia muun  
 wa. Eemoghon tighazonņ pa saveeņ todi tonowen  
 pughu maau. Tauto tikaal saveeņ tonenen ngara,  
 ve tizuaria di tighaze le tiwatag katin pughu: Pale  
 neez o Maaron igham mulin tamtoğhon toni? Ve  
 uraat tonowen pale ivot vena? Pasa, Krisi Avuvu  
 to ineep ila lolodi, ye ipaghazonņan di pa mbeb pida  
 ighaze Krisi pale imbaad patanņani naol itagħon  
 Maaron ngar toni. Le isob, għoro iza tiina ivot  
 ighazonņ, ve ineep toman nguruba tiina izi ndug  
 sambam. *Mbo 22; Is 53; Mt 13:17+; Lu 24:26+*

12 Tovenen Maaron ipaghazonņan yes propeta pa  
 ngar toni, ve isaav padi ighaze: Aliņa to tisavia,  
 nene inarua sawa todi maau. Saveeņ todi inarua  
 gham. Tovenen saveeņ todi tonowen inepneep  
 tovene inim inim le sawa toit, għoro anona ivot.  
 Ve aazne, Avuvu Patabuanņ to Maaron imbaanņ  
 sambam ve izi inim, ye ipamundigin yes uraata  
 to Krisi, ve tisavia varu poia payam ve aloonņ wa.  
 Ngar popoia to tisavia di payam, yes anela paam  
 tighaze le tiwatag di, għoro poia. *Mban 2:2+; Ep  
 3:8+*

*Iit irau tatagħon ngar patabuanņ*

13 Tovenen agharaat ngar tiam ve anņgin taumim  
 pooi. Ve aghur ila to Maaron ariana, ve aghur

matamim pa poia toni to pale iza tiam. Sawa to Yesu Krisi imuul inim ve Maaron ipatoonja ivot ighazonj, nene pale poia toni tonowen ivot ighazonj.

*Lu 12:35, 21:34; 1Tes*

*5:6+*

<sup>14</sup> Muunj, yam akankaan pa Maaron, ve lolomim igham pa ngar samsamia naol to taan. Eemoghon aazne, Maaron igham gham anim ye tau ndinatu, ve aghaze ataghon ngar toni. Tovenen apul ngar to lolomim mungina igham pooz payam muul malep.

*Ro 12:2; Ga 5:16+; Ep 2:3, 4:17+*

<sup>15</sup> Pasa, Maaron to ipoi gham anim le, ye patabuanj. Tovenen yam irau ataghon ngar raraate inimale ival tiina to taan maau. Laghoonj tiam, yam irau ataghon ngar patabuanj moghon animale ye tau. <sup>16</sup> Saveenja timbooda pataghaanj tovene: “*You patabuanj. Tovenen yam paam irau ataghon ngar patabuanj animale you.*” *Wkp 11:44+; 2Kor 7:1; Hib 12:14*

<sup>17</sup> Maaron to yam asunjsunj pani ve awatwaata aghaze Tamamim, ye ivool to tamtoghon eta maau. Sawa to ighaze ingabiiz ghiit ve ighur atia pait, ye ighur atia pa iit tamtoghon tasob itaghon ngar to iit enaenja taghami. Tovenen sawa tuku to aneep izi taan, yam irau amatughez pani ve ataghon ngar toni. Pasa, yam awatag: Taan tonene, nene ndug tiam kat maau. Nene aneep anim loomba moghon. *Ro 2:11; Pil 2:12, 3:20; Hib 11:13+*

*Maaron ighol atia to sosor toit pa Krisi sinj toni*

<sup>18</sup> Yam awatag: Ngar naol to agham di ila to nditimumim, nanan ledi anoja poia eta maau. Muunj, yam ataghon ngar tonanan le

awaghamgham. Eemoghon aazne, Maaron ighol sosor tiam atia, tauto ipas gham avot pa ngar tonanan, ve igham gham anim le wa. Mbeb to ye ipuli pa ighol sosor tiam atia, nene irau isami inimale gol ve silva maau. *1Kor 6:20*

<sup>19</sup> Mbeb tonowen, nene Krisi tau siñ toni to ilib pa mbaliin to naol ne. Ye, tirabi imaat inimale sipsip natu to poia le poia kat. Babaña eta isami maau. *Igham 12:5; Yo 1:29+; 1Kor 5:7; Syg 5:9*

<sup>20</sup> Muun kat, sawa to Maaron ighur sambam ve taan sone, ngar toni ineep pataghaan wa ighaze imbaan Krisi inim, leso igham mulin ghiit. Maaron ighaze iuul gham. Tauto sawa paghu tonene to ye ighaze ipasob uraat toni, ye imbaan Krisi inim ve ipatoon tau ivot ighazoon ila tamtoghon matadi. *Ga 4:4; Kol 1:26; Hib 9:26*

<sup>21</sup> Muri, Krisi imaat ve Maaron ipamundigini pa mateen, ve ighami imuul iza ila pa sambam, ve igham Krisi iza ivot inim tiina le tiina kat. Ve aazne, Krisi ipamundigin gham ve aghur ila to Maaron, tauto aghurghur matamim pa sawa to ye igham mulin gham ve aneep pooi. *Mban 2:24; Pil 2:9*

### *Taghur lolood pa tonvetaz toit to Krisi*

<sup>22</sup> Aazne, yam aghur ila saveen onoon to varu poia ve ataghooni, tauto angalaan ila Maaron mata wa. Tovenen lolomim pa tonvetaz tiam to Krisi ve aghamgham poian di. Eemoghon yam irau azuaria gham le aghur lolomim padi kat. *Yo 13:34+; Ro 12:9+; 1Tim 1:5; 1Yo 3:18*

<sup>23</sup> Pasa, Maaron ivazog saveen toni ila lolomim inimale aniin uve poia, ve saveen tonanan itoor

gham anim paghu wa. Saveeņ toni irau isami, ma isob ne maau. Pasa, nene Maaron tau aliņa mata yaryaara to pale inep tovene itaghoni taghoni gha ila. *Lu 8:4+; Yo 1:13; Yems 1:18*

<sup>24</sup> Saveeņa timbooda pataghaaņ tovene:

“Tamtoğhon to taan, tisob timatmaat rikrikia tinimale kikiliņ.

Ve mbeb naol to tamtoğhon tighamgham izadi padi, nene tinimale kananāņ ruņgu to timalai rikrikia ve titaptap.

Kikiliņ imatmaat, ve kananāņ ruņgu titaptap.

<sup>25</sup> Eemoghon Ngeu Tiina aliņa, nene inepneep tovene irau sawa isob.” *Mbo 103:15, 119:89*  
Saveeņ tonowen, nene varu poia to tivotia payam.  
*Mt 5:18; 24:35*

## 2

### *Iit irau lolood pa loņaaņ Maaron saveeņ toni*

<sup>1</sup> Tovenen ņgar samsamia ve ņgar kaarom to naol ne, yam apul di tisob tineepledi. Ve aparim tau-mim pa ghurla tiam malep. Yam irau aghur ila kat toman lolomim. Nditamim to ledi mbeb katindi, yam aghur koi padi malep. Ve anin avomim pa nditamim malep. *Ep 4:25; Kol 3:8+; Hib 12:1*

<sup>2</sup> Saveeņ to Maaron, nene iņgalaāņ moghon. Ngar samia eta inep ila lolo maau. Ve ipalot gham pa nepooņ to anunumim inimale tuz to ndipain tighuni. Tovenen yam aghaze le alonļooņa irau sawa isob, inimale ndipain to ņgaramus tipoop di ne lolodi pa tighun tuz. Leso ipatubun ņgar to Krisi inim tiina ila lolomim, ve sawa to Mboņ Muri, Maaron pale igham mulin gham ve aneep pool.

<sup>3</sup> Tovenen saveeņ to Tiina toit, akisi tuņja. Pasa

poia toni, taumim atoova ve ayamaana wa. *Mbo 34:8*

*Krisi tamtoghon toni tinim rumai to Maaron Avuvu*

<sup>4</sup> Krisi, ye inimale yaam mata yaryaara to ikis rumai to Maaron iyoon ariana. Tovenen yam anarua ala. Onoon, tamtoghon tivelegi tighaze ye tamtoghon sorok, ve tizuruni. Eemoghon Maaron tau ighuri pa uraat toni, ve lolo pani kat. Ye ighita Krisi inimale yaam poiawaat to atia tiina kat. <sup>5</sup> Yam to aneep ila lupuuŋ to Krisi lolo ne paam, yam animale yaam matadi yaryaara to Maaron ireirei rumai toni padi, leso tau Avuvu ineep ilooŋ ila. Ve yam anim ndiran patabuaŋa to watoonrau, leso ambees pa Maaron. Ve Avuvu Patabuaŋ ipamundigin gham, tauto asuŋsuŋ pa Maaron ve apapaiti, ve aghamgham uraat ve ŋgar popoia naol. İla uraat to Krisi, ŋgar tiam naol tonanan tinim watoonrau popoiadi ila Maaron mata. *Ro 12:1; 1Kor 3:16; Ep 2:21+; Syg 1:6*

<sup>6</sup> Saveeŋa timbooda pataghaaŋ tovene:

“Aghita. You pale naghur yaam eez ineep izi lolooz Zion. Yaam tonowen, poiawaat kat ve atia tiina. Taug naghuri pa ipariaaŋ rumai tiou.

Tamtoghon tisob to tighur ila toni, nene pale tighita anoŋa to ghurla todi. Eta irau ighur mata pani sorok ve maya ne maau.” *Is 28:16; Ro 9:33*

<sup>7</sup> Yam to aghur ila, aghita Krisi inimale yaam poiawaat eez to atia tiina kat. Ve yes to tighur ila maau ne, Maaron aliŋa waaro ru, nene denja kat padi:

“Yaam to yes to reiŋ ruum matadi velegini ve tipiyaava ilale, tauto tighuri inim pughu pa ruum ve ipaloti. Leso ruum iyoon ariana izala pogho. *Mbo 118:22; Mt 21:42*

<sup>8</sup> Yaam tonowen, tamtoghon pida pale titut aghedi ila, ve titap tizi.

Ve pida tighita ve tirere pani. Tauto igham di titap.” *Is 8:14*

Yes titap pasa, tizoor Maaron aliŋa. Ngar todi tonowen, Maaron ighuri padi pataghaan wa. *Lu 2:34, 20:18*

*Maaron tamtoghon toni tinim ndiran to watoonrau to timbees pa kinik tiina*

<sup>9</sup> Eemoghon yam, Maaron isia gham anim le, ve igham gham anim lupuun ee moghon wa. Yam ndiran to watoonrau to ambees pa kinik tiina. Ve yam tamtoghon patabuana to Maaron. Ye ipoi gham ve apul ngar to ndoroom, ve aloon ala ghazona toni lolo, lesa avotia ngar popoia naol naol to ye ighamgham di payam. Ghazona tonowen, poia le poia kat. Ighaze tagham ngar pani, nene pale ngar toit iraua maau. *Igham 19:5+; Kol 1:13; Syg 5:10*

<sup>10</sup> Muun, yam aneep iloon ila lupuun to Maaron maau. Ve aazne, yam anim tamtoghon toni patabuana. Muun, ye lolo isamin gham maau. Ve aazne, lolo isamin gham ve ireu sosor tiam wa. *Ro 9:25+*

*Tagham ngar to denja moghon ila tamtoghon matadi*

<sup>11</sup> Yam ndiran tiou, lolog payam kat. Aghita: Taan tonene, ndug tiam maau. Yam aneep anim



loomba moghon. Pasa, ndug tiam kat, nene sambam. Tovenen naghaze napalot gham: Ngar samsamia naol to lolomim igham padi, yam apul di tineepledi. Nene nasavia ngar to lolomim mungina to tipaparab toman ngar to anunuud. *Ro 13:14; Ga 5:16+; Pil 3:20; Hib 11:13+*

<sup>12</sup> Yam irau agham ngar denja moghon ila yes to tiwatag Maaron maau ne matadi. Onoon, aazne, tingal saveen naol payam tighaze yam ndiran to ghamuun ngar samsamia. Eemoghon ighaze tighita gham ataghon ngar poia, nene pale igham di titoor ngar todi. Leso sawa to Maaron inim ve ighur atia pa tamtoghon, yes paam pale tipait iza pa tapiri ve poia toni. *Mt 5:16; Ro 12:17; 2Kor 8:21; Pil 2:15*

*Taneep ila daba toit sambadi ve taloon alinadi  
(Rom 13:1-7; Ep 5:22-6:9; Kol 3:18-4:1)*

<sup>13</sup> Yam anim Tiina toit Yesu Krisi le wa. Tovenen tamtoghon tisob to tighur di tinim daba pait, yam irau aneep ila sambadi ve aloon saveen todi. Tovenen aneep ila kinik to Rom to iza tiina kat ne samba. *Mt 22:21; Tit 3:1*

<sup>14</sup> Ve daba pida to tingin ndug ne paam, azoor di malep. Aneep ila sambadi ve aloon saveen todi. Pasa, yam awatag: Kinik ighur di, lesu tighur atia pa ndiran samsamiadi ve titatan di, ve tipakur yes to titaghon ngar poia. <sup>15</sup> Tovenen Maaron ighaze yam agham ngar poia moghon. Leso apoon yes kankanooŋa to tingal saveen pait ne avodi, ve tipul saveen todi tonowen ineep. Ndiran tonowen saveen todi inimale saveen to borouŋa. *Tit 2:8*

<sup>16</sup> Onoon, ila uraat to Krisi, yam anim mbesooŋa muul maau. Eemoghon agham ngar aghaze:

“Aazne, you nanġin taug. Tovenen sa nġar to nag-haze naghmi, nene irau naghmi.” Venen malep. Pasa, ighaze agham nġar tovene, nene pale inim pughu payam pa agham sosor. Yam irau ataghon nġar to ipatoonġ gham ighaze yam mbesoonġa to Maaron. *Ga 5:1,13*

<sup>17</sup> Tovenen matamim izi pa tamtoghon eta malep. Ighaze tamtoghon ledi izadi, ma ledi izadi maau, yam agham nġar poia moghon padi. Ve lolomim pa tonvetaz tiam to Krisi ve agham poian di, amatughez pa Maaron ve ataghon nġar toni, ve atandag pa kinik.

*Saveen ġarua yes mbesoonġa  
(Ep 6:5-8; Kol 3:22-25)*

<sup>18</sup> Yo, you leg saveen ris pa yam mbesoonġa. Yam irau atatan taumim, aneep ila daba tiam sambadi, ve atandag padi. Yes to tigham poian gham ve tipatoonġ nġar poia payam, ve yes to tigham ariana payam ne paam. *1Tim 6:1+; Tit 2:9+*

<sup>19</sup> Onoon, ighaze matamim inġal Maaron ve ataghon nġar toni, ve tamtoghon tighur pataġani payam, nene denġa maau. Eemoghon ighaze ayoon ariana pa badoonġ pataġani tonanan, nene pale Maaron lolo poia payam, ve ipakur gham.

<sup>20</sup> Eemoghon ighaze yam agham nġar samia ve tilos gham, ve abaad pataġani tonenen, nene pale sei ipait gham? Maau. Ve ighaze ambaad pataġani pa taghoniin nġar denġa, nene pale Maaron lolo poia payam, ve ipakur gham. *1Pe 3:14,17, 4:14+*

*Tayoon ariana pa badoonġ pataġani, lesa tataghon Yesu aghe muri*

<sup>21</sup> Maaron ipoi gham anim le, lesa ataghon ngar tovene. Aghita. Krisi imbaad patanjani tiina kat pa iuul gham. Ye ipatoon gham pa ngar toni tonowen, lesa aghita ve ataghon aghe muri. *Mt 16:24; Yo 13:15; 1Yo 2:6*

<sup>22</sup> “Ye igham sosor eta maau, ve saveen kaarom eta ivot ila avo maau.” *Is 53:9; 2Kor 5:21; Hib 4:15*

<sup>23</sup> Ve sawa to tipiyaav saveen velegiin pani, ye ipamuul saveen todi maau. Neneenja moghon. Ve sawa to tighur yabyabuun pani, ye isavia saveen eta pa ipamatughezan di maau. Ye inumeer Maaron, ve ipul tau ila ye nima. Pasa, ye iwatag: Gabizoon to Maaron, nene denja moghon. *Mk 15:4+; Ro 12:19; 1Tes 5:15; 1Pe 3:9*

<sup>24</sup> Sawa to Krisi imbaad sosor toit atia izala ai pambaroon, ye iyamaan yabyabuun tiina kat ila tini. Lesa tasob pa ghamuun ngar samia, ve taneep poia ila toni, ve tataghon ngar denja moghon. Tovenen sip to ineep ila Krisi tini, tauto igharaat gham poiamim wa. *Is 53:5; Ro 6:10+*

<sup>25</sup> Muun, yam aneep animale sipsip to tisagsag. Ve aazne, amuul anim to Nginiin tiam Krisi wa. Ye Ngeu to mata pa anumumim irau sawa isob. *Is 53:6; Yo 10:14; Hib 13:20*

### 3

#### *Saveen injarua yes vaivainja*

<sup>1-2</sup> Yam ndiliva vaivainja paam, you nasaav payam tovene. Atatan taumim ve aneep ila ndizwamim sambadi. Ighaze todi pida tizoroor Maaron alinja, yamja awazoran gham malep. Apul saveen padi. Pasa, ighaze tighita gham atandag padi, ve amatughez pa Maaron ve

ataghon ngar toni, ve agham ngar ngalaana moghon, nene pale ngar tiam tonanan ighereb di tila to Krisi. Leso yes paam tighur ila toni ve tinim le. *1Kor 7:14+; Kol 3:18; Tit 2:5*

<sup>3</sup> Ataam naol to tagharaat tauud lesa paghunaad ila tamtoghon matadi inimale tapirai dabaad raua, ma tatiik ghiit pa mbeb milmilia, ma tandud ghiit pa nonogiina popoiadi to atiadi tintina, yam ndiliva agham ngar tiina pani malep. Pasa, nene mbeb sorok to potla moghon. <sup>4</sup> Yam irau azuaria gham pa tikoon tau. Nene ngar popoia to Maaron to ineep ila lolood. Ighaze yam ndiliva atatan taimim ve ataghon ngar luuma, ghoron ngar tiam tonanan pale inim tikoon tau payam. Tikoon tovene irau isami maau. Pale ineep itaghoni taghoni gha ila. Ve ila Maaron mata, nene mbeb tiina ve mbeb tau. *1Tim 2:9+*

<sup>5</sup> Muun, yes ndiliva patabuana to tighurghur matadi pa Maaron, tigharaat taudi tovene. Yes titatan taudi ve tineep ila ndizwadi sambadi.

<sup>6</sup> Inimale Sara. Ye ilonloon azuwa Abaram aliina, ve ipoi ighaze 'tiina toni.' Ighaze yam ndiliva agham ngar poia, ve amatughez maau ve anumeer Maaron, nene pale ataghon Sara ngar toni, ve aneep animale ye ndinatu liva.

<sup>7</sup> Ve yam vaivaina nditamoot paam. Matamim izi pa ndizwamim malep. Nepoon tiam toman di, matamim ingal di, ve agham poian di. Pasa, yam awatag: Yes tapiridi tintina maau. Ve Maaron ighaze ipatoon poia toni padi, lesa tigham nepoon poia ila toni tinimale yam. Tovenen ighaze agham samin di, nene pale Maaron ipoon taliina pa sunuun tiam. *Ep 5:25; Kol 3:19*

*Talup ghiit tanim ee moghon, ve tagham poian tamtoghon*

<sup>8</sup> Yo, nasavia saveeņ tonene, ve isob. Yam asob alup lolomim ve űgar tiam inim ee moghon. Ighaze tamtoghon eta lolo ipataņan, ghorololomim ipataņan tomani. Ve ighaze lolo poia, ghorololomim poia tomani. Lolomim pa toņvetaz tiam to Krisi ve agham poian di. Ve lolomim isamin tamtoghon ve auul di. Ve agham pa izamim malep. Yam irau atatan taumim. *Lu 6:36; Ro 12:10,16; Pil 2:2+*

<sup>9</sup> Ighaze tamtoghon tigham samin gham, ayati malep. Ve ighaze tipiyaav saveeņ samia payam ve tiveleg gham, yam apamuul saveeņ todi malep. Yam irau agham poian di, ve aghason Maaron pa ighur poia toni iza todi. Pasa, ye ipoi gham anim le, lesol ataghon űgar tovene. Ighaze agham tovene, nene pale poia toni iza tiam paam. *Mt 5:44; Ro 12:14; 1Tes 5:15*

<sup>10</sup> Pasa, Maaron isaav tovene:

“Ighaze tamtoghon eta lolo pa nepoon poia ve ighaze ighita sawa poia ve ineep toman tini iza, ye irau iņgin poian avo. Leso saveeņ samia, ma kaarom eta ivot ila avo sob.

<sup>11</sup> Ve ye irau ipul muri pa űgar samia, ve igham űgar poia moghon. Ve izuarial tau pa űgar luuma, ve ikaal ataam pa yesņa tamtoghon tisob tilup di tinim ee moghon ve tineep pooi.

<sup>12</sup> Pasa, Ngeu Tiina mata pa tamtoghon deņiadi, ve ighurghur taliņa pa suņuuņ todi.

Eemoghon yes to tighamgham űgar samia, ye

mata ighaughau padi ve ighur koi padi.”  
*Mbo 34:12+*

*Saveeñ injarua yes to timbaad patañani pa Krisi iza*

<sup>13</sup> Ighaze yam azuaria gham pa ghamuun ngar poia, sei pale irau iwaghamun gham? Maau.\* *Mt 10:28; Ro 8:31,35+*

<sup>14</sup> Eemoghon ighaze ataghon ngar denja ve ambaad patañani pani, lolomim poia. Pasa, poia to Maaron pale iza tiam. Tovenen ighaze tamtoghon tigham ngar eta pa tipamatughezan gham, yam amatughez ve agham ngar naol malep. *Mt 5:10; 1Pe 2:20, 4:14*

<sup>15</sup> Yam irau aghur Krisi inim Tiina tiam ila lolomim ve apatab pani.

Sawa isob, agharaat ngar tiam pooi. Ighaze tamtoghon tighason gham pa ghurla tiam, yam irau apamuul ghasoniin todi, ve apaghazonan di pa pughu to aghurghur matamim pa sawa to Krisi igham mulin gham. *Kol 4:6*

<sup>16</sup> Ve aloon. Sawa to yam apamuul ghasoniin todi, matamim izi padi malep. Asavia saveeñ luuma ve saveeñ poia moghon padi. Aazne, tamtoghon tiyou avodi payam ve tiwaghamun izamim pasa, yam anim Krisi le, ve ataghon ngar poia. Tovenen laghoon tiam, yam irau ataghon ngar to awatagi aghaze nene ingalaan moghon ila Maaron mata. Leso koiamimña tonowen tighita ngar poia to aghami, ve mayadi. *Tit 2:8; 1Pe 2:12*

---

\* **3:13:** Onoon, tamtoghon irau tiwaghamun iit tamtoghon to Krisi anonaad. Eemoghon irau tiwaghamun anunuud maau. Pasa, Maaron ingin ghiit.

17 Tovenen ighaze Maaron lolo pa tambaad pataņani pa ngar poia to taghami, nene poia. Tayok pani moghon. Eemoghon ighaze tagham ngar samia ve tambaad pataņani pani, nene poia maau *1Pe 2:20*

*Krisi, ye ngeu denja. Eemoghon imbaad pataņani, lesu igham ghiit tala to Maaron*

18 Agham ngar pa Krisi. Ye ngeu denja kat. Eemoghon igham iit tamtoghon samsamiaad inaad, ve iyamaan yabyabuņ ila tini ve imaat, lesu ireu sosor toit ve igham ghiit tala to Maaron. Uraat tonowen, ye ighami pa ee moghon, ve isob. Irau ighami muul maau. Ve Maaron Avuvu ipamundigini pa mateeņ, ve aazne ye ineep mata iyaryaar izi sambam. 19 Sawa to imundig pa mateeņ, ye ila ivotia Maaron aliņa pa avuvu samsamiadi to tighur di tilooņ tila ruum to yabyabuņ lolo.† *Ro 5:6; Hib 9:26; 1Pe 4:6*

20 Muuņ, sawa to Noa, avuvu samsamiadi tonowen tizoor Maaron aliņa. Eemoghon ye ighur atia padi rikia maau. Ye isanjan Noa le ipasob uraat to ghuzuuņ waan, ghoru ighur atia padi. Yes to tilooņ tila waan lolo, ival maau. Yes liim ve tol moghon. Ve sawa to ya ivon toman tapiri, Maaron iuul di ve tineep pooi. *Mbnp 6:5–7:24*

---

† **3:19:** Saveeņ waaro tonene pughu ighazooņ kat maau. Eemoghon ndiran ngara pida tighaze saveeņ tonene pughu, nene vene: Sawa to Noa, yes anjela samsamiadi to titaghon Sadan, tigham didiaan kat, ve tipazaagh tamtoghon pa ghamuuņ ngar samsamia naol. Tovenen Maaron izurun di tila tineep izi ndug eez. Lesu tisanjan sawa to ye ighur katin atia padi. Sawa to Krisi imaat, ye ila to yes anjela samsamiadi tonowen, ve ivotia saveeņ padi ighaze ye ilib padi wa.

<sup>21</sup> Ya tonowen, nene inimale ngar to ghamuun ya to aazne igham mulin gham. Nene nasavia ngar to tirughuuz ghiit ve muun ighau pa tiniid ne maau. Pasa, mbeb tiina kat to ghamuun ya, nene vene: Iit taghason Maaron pa igham ghiit tangalaan ila mata, ve tambua saveen pa tataghon ngar toni. Ngar tovene irau igham mulin gham pasa, Maaron ipamundigin Yesu Krisi pa mateen wa. *Tit 3:5; Hib 10:22*

<sup>22</sup> Ve ye iza ila sambam, ve aazne ineep ila Maaron nima waan. Tauto anela toman avuvu naol to izadi ve tapiridi tintina, tisob tineep ila ye samba. *Mbo 110:1; Mk 16:19; Ep 1:20+*

## 4

*Ngar to tamtoghon to Krisi igham di tinim paghu*

<sup>1-2</sup> Tovenen sawa to Krisi ineep izi taan, ye imbaad patajani ve iyamaan yabyabuun ila tini, leso iuul ghiit. Yam tovene paam. Agharaat gham ve asajan pa badoon patajani. Leso ataghon ngar to Krisi tonowen. Pasa, tamtoghon to ighaze imbaad patajani pa Krisi iza ve iyamaan yabyabuun ila tini, ye isob pa ngar samia wa. Tovenen sawa to ye ineep izi taan, ngar to lolo muņgina irau igham pooz pani muul maau. Ye pale itaghon Maaron lolo. *Ro 6:2+; 2Kor 5:15; Ga 5:24; 1Pe 2:21*

<sup>3</sup> Ngar samsamia naol to yes kankanooņa lolodi igham padi, yam agham di iraua. Aghita. Muun, lolomim ipazaagh gham pa ghamuun ngar samsamia naol. Sawa tonenen, matamim samia animale ngavuun, ve aghunghun le awaghamgham, aluplup gham pa ghanghaniin ve ghunghunuun toman oroor tiina, ve ambesmbees pa maaron



kaaromnja to tutuuŋ to Maaron ingalsekin ghiit padi. *Ro 13:12+; Ep 4:20+*

<sup>4</sup>Ve aazne, nditamim tighita gham ve tigham njar naol. Pasa, yam ala toman di ve yamja alup gham pa ghamuuŋ njar samsamia naol tonowen muul maau. Tauto tipiyaav saveeŋ samsamia naol payam, ve tiveleg gham. <sup>5</sup>Eemoghon muri, yes pale tiyoon ila Ngeu Tiina mata, ve tivotia njar to tighami izi taan ne pani. Ye igharaat tau, ve isasaan sawa to ingabiiz tamtoghon tisob ve ighur atia padi. Yes to tineep matadi iyaryaar, ve yes mateeja paam. *Mbarj 10:42; 2Tim 4:1; Yems 5:9*

<sup>6</sup>Maaron ighaze tamtoghon toni tineep matadi iyaryaar tinimale ye tau. Pughu tonene to tamtoghon toni to timaat wa, sawa to tineep matadi iyaryaar, tilooŋ varu poia.\*

Yes timaat pasa, tamtoghon tisob to taan to tigham sosor, Maaron ighur atia padi. Eemoghon ila uraat to Avuvu Patabuanj, aazne anunudi tineep matadi iyaryaar. *Ro 6:23, 8:10; 1Pe 3:19*

*Tagharaat tauud ve tagham uraat to Maaron ighuri inim nimaad*

<sup>7</sup>Aazne, sawa to mbep tisob tilaledi, nene inim igharau wa. Tovenen agham njar pooi, ve anjin

---

\* **4:6:** Ataam to muuŋ Maaron tamtoghon toni tilooŋ varu poia, nene saveeŋ mbuaanj toni katindi to tisavia Mesia. Yes to tighur ila saveeŋ mbuaanj tonowen, Maaron ighita di ighaze yes tighur ila to Mesia. Ve ila ghurla todi tonowen, ye ighita di ighaze tineep denjadi ila mata. Tovenen sawa to timaat, ye igham anunudi tineep matadi iyaryaar. Ve aazne, Mesia izi inim taan wa. Tovenen sei to ighaze ighur ila to Kriisi, ve imaat, Maaron pale igham anunu ineep mata iyaryaar paam.

taumim pooi. Leso iuul gham pa sunjuun tiam. *Ro 13:12+*

<sup>8</sup> Ve mbeb tiina to ilib pa mbeb tisob, nene ngar to lolood pa tauud. Tovenen azuaria gham le ataghon katin ngar tonene. Pasa, ngar to lolood pa tauud, nene igham ghiit tapul sosor naol to tamtoghon tigham pait, ve lolood imaagh padi. *Np 10:12; 1Kor 13:4+; Kol 3:14*

<sup>9</sup> Ngar to ghamuun poian loomba irau ineep ariana ila lolomim. Ayasiil pani malep. *Ro 12:13; Hib 13:2*

<sup>10</sup> Maaron ireirei uraat ve ngar popoia naol naol pait itaghon tau poia toni. Tovenen sa uraat ma ngar to ye ireii payam, angin poiani ve agham anona toni ivot. Leso awaulan gham, ve anim mbesoona popoia to Maaron. *Ro 12:6+; 1Kor 12:7+; Ep 4:11+*

<sup>11</sup> Tovenen ighaze ngeu eta le uraat pa ivotia Maaron aliña pa tamtoghon, ye isaav itaghon tau ngar toni malep. Isaav inimale Maaron tau isavsaav ila avo. Ve ighaze tamtoghon eta le uraat pa iuul tamtoghon, ye irau igham tapiri ila to Maaron ve igham uraat tonenen. Ighaze yam agham tovene, nene pale ngar tiam isob igham tamtoghon tipait Maaron pa tapiri ve poia toni ila Yesu Krisi iza.

Tapakur Krisi iza ve tapaiti pa tapiri, to aazne ve itaghoni taghoni gha ila. Onoon.

*Ighaze tambaad patanani pa Krisi iza tagham ngar naol malep*

<sup>12</sup> Yam ndiran tiou, lolog payam kat. Onoon aazne, patanani tiina kat itoov ghurla tiam, ve ayamaana inimale yab ighan gham. Eemoghon

patañani to ivot payam ne, ruñamim iza pani ve agham ñgar naol aghaze nene patañani ite kat ne malep. Pasa, patañani tovene igham Maaron tamtoğhon toni katindi wa. *Mbañ 14:22; 2Tim 3:12; 1Pe 1:6+*

<sup>13</sup> Lolomim poia. Pasa, aazne, yam alup toman Krişi ve ambaad patañani inimale muuñ ye imbaada. Tovenen ayoon ariña. Leso sawa to Krişi ipatoñ tapiri ve iza tiina ivot ighazoñ, ye pale igham gham lolomim poia le poia kat. *Pil 3:10; Kol 1:24*

<sup>14</sup> Tovenen ighaze yam avotia Krişi iza ve atagħon ñgar toni, ve tamtoğhon tipiyaav saveeñ samia payam ve tiveleg gham, għoro tinimim iza pa poia to Maaron to iza tiam. Pasa sawa tovene, Maaron Avuvu to ipatoñ Maaron tapiri ve poia toni pait, pale ineep kat toman gham. *Mt 5:11*

<sup>15</sup> Eemogħon tiam eta irab tamtoğhon imaat, iyub, isegeed saveeñ sorok, ma igham ñgar samia ite paam malep. Pasa, ighaze agham ñgar tovene ve tiñgal matamim pani, nene poia maau. [Ñgar tovene igham mayañiña pa Krişi ve iwagħamun iza.] <sup>16</sup> Eemogħon ighaze yam atagħon Krişi ve ambaad patañani pani, mayamim malep. Tinimim iza ve apait Maaron. Pasa, Krişi igham gham anim le wa. Tauto tiwaat iza payam tighaze yam Kristen. *Mbañ 5:41; Pil 1:29*

<sup>17</sup> Sawa to Maaron iñgabiiz tamtoğhon toni ve

ighur atia padi, tauto taza pani wa.†  
 Ve ye ighaze ingabiiz ghiit muun̄. Le isob, ghero ingabiiz yes pida paam Aghita. Ighaze ye igham tovene pa iit tamtoghon toni, pale igham sa ngar pa yes to tizorzoor varu poia toni? <sup>18</sup> Maaron aliña to timbooda, isaav tovene:

“Ataam to Maaron igham mulin ghiit, nene ipatan̄an kat pa ndiran denjadi titaghoṇi.

Ighaze venen, pale vena pa ndiran samsami-adi to matadi ingal Maaron rita maau? Pale sa ngar ivot padi?”

*Np 11:31*

<sup>19</sup> Tovenen ighaze Maaron lolo pa yam ambaad patan̄ani pa Krisi iza, yam aghur taumim ila ye nima, ve agham ngar poia irau sawa isob. Ye irau ipul muri payam maau. Pasa, ye to ighur gham, ve lolo ikis tamtoghon toni ariña. *Mbo 31:5; Lu 23:46; Mban̄ 7:59*

## 5

*Nginiña irau tin̄gin poian Maaron tamtoghon toni*

<sup>1</sup> Yo, you naghaze napalot nginiña tiam pa saveeṇ pida. Pasa, you paam nginiñ nanimale yam. Ve patan̄ani to Krisi imbaada, taug naghita katini pa matag. Ve sawa to Krisi imuul inim ve ipatooṇ tapiri ve iza tiina ivot ighazooṇ, nene

---

† **4:17:** Petrus ighita ighaze patan̄ani to yes Kristen timbaad di, ngara tovene: Aazne, Maaron ingagabiiz tamtoghon toni. Ve ighaze ngar todi denja maau, ye ipul patan̄ani ivot padi pa ipasalun̄gan di. Leso sawa to Mboṇ Muri ve gabizooṇ tau ighaze ivot, yes pale tineep pooi. Eemoghon yes to tighur ila maau, ye ipul di tineep tovene le sawa to Mboṇ Muri, ghero ingabiiz di ve ighur atia padi ve tilaledi.

pale you paam itiŋa taneep ila Krisi ŋguruba lolo. Tovenen yam ŋginiŋa irau alooŋ aliŋag tonene, ve ataghoni. <sup>2</sup> Maaron ighur uraat ilat nimamim wa ighaze aŋgin sipsip toni. Tovenen matamim padi ve aŋgin poian di. Uraat tiam tonanan, ighaze tamtoghon tizoorndug payam pa aghami, nene poia maau. Aghami toman lolomim, ghoru poia. Leso ataghon Maaron lolo. Ve agham ŋgar tiina pa lemim atia malep. Pasa ŋgar tovene, taghita poia maau. *Yo 21:15+; Mbay 20:28; 1Tim 3:3; Tit 1:7*

<sup>3</sup> Yes to Maaron ighur di tilat nimamim pa aŋgin di, agham taumim anim tiina padi ve atatan di tizi malep. Yam taumim irau anim patoŋaan poia pa Maaron sipsip toni. Leso tighita gham, ve titaghon gham pa ŋgar tiam. *2Kor 1:24; Pil 3:17; 1Tim 4:12; Tit 2:7*

<sup>4</sup> Ighaze agham tovene, sawa to Ŋginiŋ tau to sipsip imuul inim, ve ipatoŋ tapiri ve iza tiina ivot ighazooŋ, Maaron pale igham gham aneep ila tau ŋguruba lolo le alok inim lemim atia. Atia tovene, irau isami, ma isob ne maau. *1Kor 9:25; 2Tim 4:8; 1Pe 1:4*

*Tatatan tauud izaad, ve taghur patanani toit ila Maaron nima*

<sup>5</sup> Yam ndipain aneep ila ŋginiŋa tiam sambadi, ve alooŋ saveeŋ todi. Ve yam asob irau atatan taumim izamim, ve ambees pooi pa taumim. Pasa, Maaron aliŋa isaav tovene:

“Yes to tipait taudi izadi, Maaron ighurghur koi padi ve itatan di.

Ve yes to titatan taudi izadi, ye ighurghur poia toni izaza todi.” *Mt 23:12; Yems 4:6*

<sup>6</sup> Tovenen atatan taumim, ve aneep ila Maaron ariana nima samba. Ighaze agham tovene, ye pale ipait gham ila sawa to ye tau ighuri. *Lu 1:52, 14:11; Yems 4:10*

<sup>7</sup> Patanjani tiam naol to lolomim imbumbu padi, aghur di tisob tila Maaron nima. Ye pale iuul gham. Pasa, ye igham ngar tiina payam ve mata payam. *Mbo 55:22; Mt 6:25+; Pil 4:6*

<sup>8</sup> Agham ngar pooi ve matamim iza. Pasa, koiamim Ngeu Samia ilaghlaagh inimale laion to itantanj ve ikalkaal tamtothon pa ighani.

<sup>9</sup> Tovenen akis ghurla tiam tunja, ve aparab ariana. Leso atatani. Pasa, yam awatag: Tonvetaz tiam to Kriksi to tineep irau ndug ndug, timbaad patanjani raraate inimale yam ambaada. *Ep 4:27, 6:11+; 1Tes 5:6; Yems 4:7*

### *Saveen palotiin pida*

<sup>10</sup> Maaron toit to poia pughu, ye ipoi gham anim Kriksi le, lesa igham gham ala aneep tomani ila nguruba lolo le alok. Patanjani to aazne ambaada ne, mala maau pale isob. Ve muri, Maaron tau pale igham gham aneep poia muul ve ipalot gham, lesa ayoon tunja ve akis ghurla tiam ariana. *2Kor 4:17; 1Pe 1:6*

<sup>11</sup> Ye ariana, ve tapiri toman pooz toni, nene inep-neep tovene irau sawa isob. Onoon.

### *Paesiin pida*

<sup>12</sup> Silas iuul ghou pa bodeen rau tuku tonene. You naghita naghaze ye tonvetaz toit eez to lolo inep tunja ila to Kriksi ve tini imbees kat pa uraat toni. Nambood rau tonene ilat tiam pa napariaan gham. Lesa aghur ila aghaze poia to Maaron to

nasavia ila rau tonene, nene mbeb tau. Tovenen akisi tunjia.

<sup>13</sup> Nditamim to Maaron isia di tinim le tinimale yam ve tineep izi ndug tiina Babilon,\* tigham ndag poia todi ilat payam. Ve natug Markus paam, igham ndag poia toni payam. *Mbanj 12:12, 13:5,13, Mbanj 15:37+; 2Tim 4:11*

<sup>14</sup> Yam asob awakisin nimamim† itaghon ngar to lolood pa tauud.

Yam to aneep tunjia ila to Krisi, Maaron pale igham gham asob aneep poia toman lolomim luma. Onoon. *Ro 16:16*

---

\* **5:13:** Petrus isavia saveen tonene iza to lupuun eez to Krisi to tineep izi ndug tiina Rom. † **5:14:** Petrus imbood saveen tovene: 'Aghan avomim itaghon ngar to lolood pa tauud.' Nene ataam todi to tipatoon tighaze lolodi pa taudi. Ve iit tagham tovene maau. Tayanjin pa tamtoghon, ve tawakisin nimaad.

**Maaron Saveen Toni Patabuan**  
**The New Testament and portions of the Old Testament**  
**in the Oov Dialect of the Saveeng language of Papua**  
**New Guinea. The Saveeng language is also called Mutu**  
**or Mutu-Tuam.**

**Sampela hap Buk Baibel long tokples Saveeng Oov**  
**long Niugini**

copyright © 2011 Wycliffe Bible Translators, Inc.

Language: Saveeng (Mutu)

Dialect: Oov

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

---

PDF generated using Haiola and XeLaTeX on 11 Nov 2022 from source files dated 9 Oct 2020

c7a45d99-91a2-564f-9c55-d2efc8be7fae